



Stefano Keller, estrarano de UEA pri eksteraj rilatoj

**AGADE, CELEBRANTE:
EK AL NOVA JARO!**



Ĝus komenciĝis la agadjaro 2014 kaj ni ĉiuj kun nova elano, freŝaj fortoj kaj planoj preparas aktivecojn. Ĉiu el ni volas, ke en la nova jaro ni estu pli efikaj ol en la pasinta, niaj rezultoj pli multaj kaj pli signifaj ol antaŭe.

Niaj bazaj deziroj movadanaj estas ja konataj: ĉiam pli da homoj parolu Esperanton, estu (pli da) lingva justeco en la mondo. Krom esti esperantisto, kiel civitanoj de nia lando, aŭ tutsimple, kiel homoj, ni luktas ne nur por lingvaj rajtoj, sed ankaŭ pli ĝenerale por la realigo de ĉiuj homaj rajtoj, por paca kunvivado de ĉiuj, por la respekto de la diversecoj kultura kaj vivĉirkaŭa, por ebligi kaj certigi viveblan futuron ankaŭ por niaj posteuloj.

Niaj kontribuoj tra la jaro, eĉ se nur laŭ niaj specifaj celo kaj kompetento, estu utilaj eroj aldonitaj al la komuna strebado por pli bona kaj pli justa vivo por ĉiu, konstruante tiel mondon kun daŭripova evoluo por ĉio kaj ĉiu, en harmonia diverseco.

Por gvidilo pri farenadoj, projektoj, povas servi al ni listo de memortagoj, datrevenoj, en kies celebrado ni povas, kaj sekve de la supraj konsideroj, eĉ devas partopreni kune kun ne-esperantistoj. La estrara subteamo de UEA, respondeca pri Monda Evoluo laŭ la laborplano, pretigis kalendaron el datoj elektitaj specife por nia movado. Tiuj eventoj ebligas al ni kontribui al celoj, kiujn la tuta homaro enfokusigas, krome, per nia kunago, ni povas prezenti justan solvon al problemoj de interetna komunikado, daŭripovecon subtenantan, jam de ni praktikatan.

En venontaj revunumeroj aperos priskriboj kaj agadproponoj detalaj pri la opaj eventoj. Bone notu nun tiujn ĉi datojn por ĝustatempe povi pretigi vian kunagadon. La monatoj *januaro* kaj *junio*, sen proponataj festendaĵoj, permesos al vi pli longan pretiĝon al la alimonataj eventoj. Sed krom tiuj ĉi datoj, eventoj, ekzistas granda kvanto da aliaj okazoj, kiujn ĉiu loka grupo aŭ individua aganto povas trovi kaj alpreni laŭplaĉe en sian agadprogramon.

Februaro	Marto
13 Monda Tago de la Radio [Unesko] 17-23 Semajno de Internacia Amikeco [UEA] 20 Monda Tago pri Socia Justeco [UN] 21 Tago de la gepatra lingvo [Unesko]	8 Internacia Virina Tago [UN] 21 Internacia Tago de la forigo de rasa diskriminacio [UN]
Aprilo	Majo
22 Internacia Tago de la Tero [UN]	21 Monda Tago por Kultura Diverseco, por Dialogo kaj Evoluo [UN] 22 Internacia Tago por Vivo-Diverseco [UN]
Julio	Aŭgusto
26 Esperanto-Tago - Lingva justeco [UEA]	9 Internacia Tago de Indiĝenaj Popoloj de la Mondo [UN] 12 Internacia Junulara Tago [UN]
Septembro	Oktobro
21 Internacia Paco-Tago [UN] 26 Eŭropa Tago de Lingvoj (en europa)[EU] 30 Monda Tago de Tradukado [FIT]	5 Monda Tago de Instruistoj [Unesko]
Novembro	Decembro
16 Internacia Tago de Toleremo [UN]	10 Tago de Homaj Rajtoj [UN], Priesperanta rezolucio de Unesko (Montevideo 1954) [UN/Unesko] 15 Zamenhof-Tago / Tago de la esperanta libro [UEA]
Internaciaj jardekoj de UN: <u>2011-2020</u> - UN Internacia Jardeko pri Biodiverseco [UN] <u>2013-2022</u> - Internacia Jardeko de Alproksimiĝo de Kulturoj [Unesko]	

Krom ĉiuj tiuj datoj kaj eventoj, eblas regione konsideri la sekvajn eblojn por agadoj: Internaciaj, naciaj aŭ regionaj eventoj, kiuj rilatas al lingvo, kulturo, etnoj, interetna interŝanĝo, amikeco kaj paco. Ekzemple: Lingvo-salonoj/ekspozicioj; Libro-ekspozicioj/salonoj/foiroj; plurkulturaj festoj, festivaloj; konferencoj, renkontoj - kies liston laŭfakte, laŭteme kaj laŭloke vi certe povos trovi en via regiono. Sukcesplenan agadjaron!

<http://uea.org/vikio/Festotagoj>

Artikolo aperinta en la [revuo ESPERANTO](#) de UEA, Januaro 2014, sur paĝo 7.